


契丹國志

六







契丹國志卷之二十二

州縣載記

契丹自太祖太宗初與戰爭四十餘年吞併諸蕃割據  
燕雲南北開疆五千里東西四千里共二百餘州  
建五京五處

燕京三司 西京轉運 中京度支 上京鹽鐵

東京戶部錢鐵司

大藩府六處

南大王府 北大王府 乙室王府 黃龍府

興中府 奚王府

錢帛司三處

平春路 遼西路 平州

節鎮三十三處

奉聖州 雲內州 長春府 龍化州 海北州

貴德府 蔚州 應州 朔州 綿州

乾州 顯州 震州 遼州 咸州

潘州 薊州 復州 慶州 祖州

川州 成州 萊州 懿州 宜州

坤州 平州 辰州 興州 同州

信州 饒州 建州

建觀察防禦軍團練使八處

武安州 永州 泰州 高州 利州

寧江州 歸州 廣州

刺史州七十餘處





德州 黔州 潭州 惠州 榆州

營州 灤州 勝州 溫州 巖州

歸化州 榆州 松州 恩州 山州

武德州 通州 韓州 烏州 靖州

寧邊州 賓州 祥州 新州 衛州

降聖州 燕州 海州 新州 銀州

遼西州 鐵州 開州 保州 薊州

北安州 岳州 嘉州 集州 連州

弘東州 演州 肅州 威州 古州

仙湖州 文州 蘭州 慎州 拱州

安州 渝州 河州 雙州 宋州

涿州 易州 檀州 順州 薊州

雍州 東州 海州 勝州 景州

許州 招州 康州 錦州 來州

儒州 雲州 平州 平州 來州

遼東邊遠不記州十餘縣二百餘外見記五處

金肅 河清 曷童 五花 振武

諸藩臣投下州二十三處

微州 濠州 驪州 衛州 荊州

問州 隨州 和州 澄州 全州

義州 遂昌州 豫州 貞州 福州

榮州 唐州 粟州 黑州 河州

茂州 麓州 宗州

控制諸國



沙漠控制沙漠之北

置西路都招討府奧隗部族衛驢駒河統軍司倒撻  
嶺衙鎮撫韃靼蒙骨迪烈諸軍

雲中路控制夏國

置西南面都招討府西京兵馬都部署司金肅河清  
軍五花城南北大王府乙室王府山金司

燕山路備禦南宋

置燕京都總管府節制馬步軍控鶴指揮使都統軍  
司牛欄監軍寨石門詳穩司南北皮室司猛拽刺司  
並隸總管府

中上京路控制奚境

置諸軍都虞候司奚王府大詳穩司大國舅司大常  
家司五院司六院司沓溫司

遼東路控制扼高麗

置東京兵馬都部署司契丹奚漢渤海四軍都指揮  
使保州統軍司陽河詳穩司金吾營空朶司  
長春路鎮撫女真室韋

置黃龍府兵馬都部署咸州兵馬詳穩司東北路都  
統軍司

**論曰**

契丹之興其盛如此其亡也忽焉惜哉

四至隣國地里遠近

東南至新羅國西以鴨綠江東八里黃土嶺為界至保州  
一十一里

次東南至五節度女真部族共一萬餘戶皆雜處山林



尤精弋獵有屋舍居舍門皆於山墻下闢之耕墾與  
渤海人同無出租賦或遇北主征伐各量戶下差充  
兵馬兵回各逐便歸本處所產人參白附子南星茯  
苓松子猪苓白布等物並係契丹樞密院所管差契  
丹或渤海人充節度管押其地南北七百餘里東西  
四百餘里西北至東京五百餘里

又次東南至熟女真國不屬契丹所管其地東西八百  
餘里南北一千餘里居民皆雜處山林耕養屋宇與  
熟女真五節度同然無君長首領統押精於騎射今  
古以來無有盜賊詞訟之事任意迁徙多者百家少  
者三兩家而已不與契丹爭戰或居民等自意相率  
賫以金帛布黃蠟天南星人參白附子松子蜜等諸  
物入貢北番或只於邊上買賣訖却歸本國契丹國  
商賈人等就入其國買賣亦無所礙契丹亦不以爲  
防備西至東京二百餘里

東北至生女真國西南至熟女真國界東至新羅國東  
北不知其極居民屋宇耕養言語衣裝與熟女真國  
並同亦無君長所管精於騎射前後屢與契丹爲邊  
患契丹亦設防備南北二千餘里八岔邊創築城堡搬  
運糧草差撥兵甲屯守征討三十年來深爲患耳南  
界西南至東京六百里

又東北至屋惹國阿里眉國破骨魯國等國每國各一  
萬餘戶西南至生女真國界衣裝耕種屋宇與女真  
人言語異契丹樞密院差契丹或渤海人充逐國節



度使管押然不出征賦兵馬每年惟貢進大馬蛤珠青鼠皮貂鼠皮膠魚皮蠶蠟之物及與北番人任便往來買賣西至上京四千餘里

正東北至鐵离國南至阿里眉等國界居民言語衣裝屋宇耕養稍通阿里等國無君長皆雜處山林不屬契丹統押亦不與契丹爭戰復不貢進惟以大馬蛤珠鷹鵠青鼠貂鼠等皮膠魚皮等物與契丹交易西南至上京五千餘里

次東北至靺鞨國東北與鐵离國為界無君長統押微有耕種春夏居屋室中秋冬則穿地為洞深可數丈而居之以避其寒不貢進契丹亦不爭戰惟以細鷹鵠鹿細白布青鼠皮銀鼠皮大馬膠魚皮等與契丹

交易西南至上京五千里

又次北至鐵离喜失牽國言語衣裝屋舍與靺鞨稍同無君長管押不貢進契丹亦不爭戰惟以羊馬牛駝皮毛之衣與契丹交易西南至上京四千餘里

正北至蒙古里國無君長所管亦無耕種以弋獵為業不常其居每四季出行惟逐水草所食惟肉酪而已不與契丹爭戰惟以牛羊駝馬皮毳之物與契丹為交易南至上京四千餘里

又次北至于斡國無君長首領管押凡事並與蒙古里國同甲寅歲曾率衆入契丹國界為盜聖宗命駙馬都尉蕭徒欲統兵大破其國迹後更不復為盜惟以牛羊駝馬皮毳之物與契丹為交易東南至上京五



千餘里

又次北西至鼈古里國又西北又次北近西至達打國各無君長每部族多者三二百家少者五七十家以部族內最富豪者為首領不常厥居逐水草以弋獵為業其婦人皆精於騎射常與契丹爭戰前後契丹屢為國人所敗契丹主命親近為西北路兵馬都統率番部兵馬十餘萬防討亦制禦不下自契丹建國已來惟此二國為害無奈何番兵困乏契丹常為所攻如暫安靜以牛羊駝馬皮毳為交易不過半年又却為盜東南至上京六千餘里

西近北至生吐蕃國又西至党項突厥等國皆不為契丹國害亦不進貢往來蓋以熟土渾突厥党項等部族所隔東南至雲州三千里

正西與西昊賊黃河為界 西南至麟州府州界

又次南近西定州北平山界 又南至霸州城北界河

又次南至遂城北鮑河為界 又南近東至滄州北海

又南至安肅軍自澗河為界 又南近東至登州北海

又南至雄州北拒馬河為界 又南至海

四京本末

上京 太宗建

上京臨潢府乃大部落之地離來州數十里即行海岸俯挹滄溟與天同碧窮極目力不知所際有訥都烏河番語山為胡都水為烏其東北三十里即長泊也涉沙磧過白馬淀渡土河亦云撞撞水聚沙成墩



少人煙多林木其河邊平處國七曹於此處過冬又  
至木葉山三十里許有居人瓦屋及僧舍

中京 承天太后建

中京之地奚國王牙帳所居奚本曰庫莫奚其先東  
部胡宇文之別種也鼠居松漠之間俗甚不潔而善  
射獵好爲寇抄其後種類漸多分爲五部一曰胥紇  
二曰莫賀弗三曰契个四曰木昆五曰室得每部一  
千人爲其帥隨逐水草中京東過小河唱叫山道北  
奚王避暑莊有亭臺由古北口至中京北皆奚境奚  
本與契丹等後爲契丹所併所在分奚契丹漢人渤  
海雜處之奚有六節度都省統領言語風俗與契丹  
不同善耕種步射入山採獵其行如飛 又契丹圖

志云奚地居上東燕二京之中土肥人曠西臨馬盂  
山六十里其山南北一千里東西八百里連亘燕京  
西山遂以其地建城號曰中京

南京 太宗建

南京本幽州地乃古冀州之域舜以冀州南北廣遠  
分置幽州以其地在北方陰幽也東有朝鮮遼東北  
有樓煩白檀西有雲中九原南有漳沁易水唐置范  
陽節度臨制奚契丹自晉割弃建爲南京又爲燕京  
析津府戶口三十萬大內壯麗城北有市陸海百貨  
聚于其中僧居佛寺冠於北方錦繡組綺精絕天下  
膏腴蔬蔬菓實稻粱之類靡不畢出而桑柘麻麥羊  
豕雉兔不問可知水甘土厚人多技藝秀者學讀書



次則習騎射耐勞苦石晉未割奔巴前其中番漢雜  
聞勝負不相當既築城後遠望數十里間宛然如帶  
回環繚繞形勢雄傑真用武之國也

東京 太宗建

東京本渤海王所都之地在唐時為黑水靺鞨一種  
依附高麗者黑水部與高麗接勝兵數千多驍武古  
肅慎之地也與靺鞨相鄰東夷中為強國所居多依  
山水地卑隰築土如堤鑿穴以居其國西北與契丹  
接太祖之興始擊之立其子東丹王鎮其地後曰東  
京

契丹國志卷之二十二



契丹國志卷之二十三

族姓原始

契丹都部族本無姓氏惟各以所居地名呼之婚嫁不拘地里至阿保機變家為國之後始以王族號為橫帳仍以所居之地名曰世里著姓世里者上京東二百里地名也今有世里沒里以漢語譯之謂之耶律氏復賜后族姓曰蕭氏番法王族惟與后族通婚更不限以尊卑其王族后族二部落之家若不奉北主之命皆不得與諸部族之人通婚或諸部族彼相婚嫁不拘此限漢人等亦同此故北番惟耶律蕭氏二姓也

國土風俗

契丹國在庫莫奚東唐所謂黑水靺鞨者今其地也有七十二部落不相統制好為寇盜與父母死而悲哭者以為不壯但以其屍置於山樹上經三年後乃收其骨而焚之因酌酒而祝曰冬月時向陽食我若射獵時使我多得膳鹿其無禮頑嚚於諸夷最甚其風俗與奚靺鞨頗同至阿保機稍并服諸小國而多用漢人漢人教之以隸書之半增損之作文字數千以代刻木之約又制婚嫁置官號稱皇帝漢時為匈奴所破保鮮卑山魏青龍中部酋為王雄所殺衆遂微逃潢水之南黃龍之北至元魏自號曰契丹在唐開元天寶間使朝獻者無慮二十故事以范陽節度為押奚契丹使至唐末契丹如盛

併合部落

初契丹有八部族之大者曰大賀氏後分為八部部之長號大人而常推一人為王建旗鼓以統八部每二年



則以次相代或其部有災疾而畜牧衰則八部聚議以  
旗鼓立其次而代之被代者以為元約如此不敢爭及  
阿保機乃曰中國之主無代立者由是阿保機益以威  
制諸國不肯代其立九年諸部共責誚之阿保機不得  
已傳其旗鼓而謂諸部曰吾立九年所得漢人多矣吾  
欲別自為一部以治漢城可乎諸部將許之漢城在炭  
山東南灤河上有鹽鉄之利乃後魏滑鹽縣也其地可  
植五谷阿保機率漢人耕種為治城郭邑屋墾市如幽  
州制漢人安之不復思歸阿保機知衆可用期妻述律  
策使人告諸部大人曰我有鹽地之利諸部所食然諸  
部知食鹽之利而不知鹽有主人可乎當來犒我諸部  
以為然其以牛酒會鹽地阿保機伏兵其旁酒酣伏發  
盡殺諸部大人復併為一國東北諸夷皆畏服之

### 兵馬制度

晉末契丹主投下兵謂之大帳有皮室兵約三萬人騎  
皆精甲也為其爪牙國母述律氏投下謂之屬珊有衆  
二萬是先戎主阿保機牙將半已老矣每南來時量分  
借得三五千騎述律常留數百兵為部族根本其諸大  
首領太子偉王永康南北王于越麻谷五押等大者千  
餘騎次者數百人皆私甲也別族則有奚靉勝兵亦千  
餘人少馬多又有渤海首領大舍利高模漢兵步騎萬  
餘人並鬣髮左衽竊為契丹之飾復有近界韃靼于厥  
里室韋女真党項亦被脅屬每部不過千餘騎其二部  
落吐渾沙陀洎幽州管內鴈門以北千餘軍州部落漢



兵合三萬餘衆此是石晉割賂契丹之地番漢諸族其數可見矣每契丹南侵其衆不啻十萬國主入界之時步騎車帳不從阡陌東西一縶而行大帳前及東西面差大首領三人各率萬騎支散游奕百十里外交相覘邏謂之欄子馬戎主吹角爲號衆即頓舍環遶穹廬以近及遠折木稍屈之爲弓子鋪不設槍營塹柵之備每軍行聽鼓三伐不問昏昼一布便行未逢大敵不乘戰馬俟近敵師即競乘之所以新羈戰馬蹄有餘力其用軍之術成列而不戰俟退而乘之多伏兵斷糧道冒夜舉火上風曳柴饋餉自齎退敗無耻散而復聚寒而益堅此其所長也

### 建官制度

賤他姓貴耶律蕭氏二姓其官有契丹樞密院及行宮

都總管司謂之北面以其在牙帳之北以主蕃事又有漢人樞密院中書省行宮都總管司謂之南面以在牙帳之南以主漢事其惕隱宗正寺也夷離畢參知政事也林牙翰林學士夷離巾刺史也內外官多做中國者其下佐吏則有敝史木古直字一作思奴古都奴古徒奴古分領兵馬則有統軍侍衛控鶴司南王北王奚王府五帳分提失哥東西都省大師兵又有國舅軫轄遙輦裳袞諸司南北皮室二十部族節度頻必里九克漢人渤海女真五節度五治大師一百六百家奚凡民年十五已上五十已下皆籍爲兵將舉兵必殺灰牛白馬祠天地及木葉山神鑄金魚符調發兵馬其從馬及傳命有銀牌二百軍所舍有遠探欄子馬以夜聽人馬



之聲每其主立聚所得人戶馬牛金帛及其下所獻生口或犯罪沒入者別為行宮頌之建州縣置官屬既死則設大穹廬鑄金為像朔望節辰忌日輒致祭築臺高丈餘以盆焚食謂之燒飯

### 宮室制度

十宮各有民戶出兵馬阿保機曰洪義宮德光曰永興宮元欲曰積慶宮述律曰延昌宮明記曰章敏宮突欲曰長寧宮燕燕曰崇德宮隆緒曰興聖宮隆慶曰敦睦宮隆運曰文忠王府又有四樓在上京者曰西樓木葉山曰南樓龍化州曰東樓唐州曰北樓凡受冊積柴升其上大會蕃夷其下已乃燔柴告天而漢人不得預有譚子部百人夜以五十人番直四鼓將盡歌於帳前號曰聒帳每謁木葉山即射柳枝譚子唱番歌前導彈胡琴和之已事而罷

### 衣服制度

國母與蕃官胡服國主與漢官即漢服蕃官戴纒冠上以金華為飾或以珠玉翠毛蓋漢魏時遼人步搖冠之遺象也額後垂金花織成夾帶中貯髮一總服紫窄袍加義繫靴鞞帶以黃紅色條裏革為之用金玉水晶碧石綴飾又有紗冠制如烏紗帽無簷不撮双耳額前綴金花上結紫帶末綴珠或紫皂幅巾紫窄袍束帶丈夫或綠中單綠花窄袍中單多紅綠色貴者被貂裘以紫黑色為貴青色為次又有銀鼠尤潔白賤者被貂毛羊鼠沙狐裘弓以皮為弦箭削樺為幹鞞勒輕快便於馳



走以貂鼠或鵝項鴨頭為汗腰宋真宗景德中太常博士王瞻戶部員外郎李維往賀國主生辰還言國主見漢使疆服衣冠事已即幅巾雜蕃騎出射獵矣

### 漁獵時候

每歲正月上旬出行射獵凡六十日然後並持魯河鑿冰釣魚冰泮即縱鷹鵝以捕鵝鴈夏居炭山或上陘避暑七月上旬復入山射鹿夜半令獵人吹角徼鹿鳴既集而射之宋真宗時晁迥往賀生辰還言始至長泊泊多野鵝鴨國主射獵領帳下騎擊扁鼓遶泊驚鵝鴨飛起乃縱海東青擊之或親射焉國主皆佩金玉錐號殺鵝殺鴨錐每初獲即拔毛挿之以鼓為坐遂縱飲最以此為樂又好以銅及石為槌以擊兔每秋則衣褐裘呼

鹿射之夏月以布步氍帳籍草圍棊雙陸或深澗張雁

### 試士科制

太祖龍興朔漠之區倥傯干戈未有科目數世後承平日久始有開闢制限以三歲有鄉府省三試之設鄉中曰鄉薦府中曰府解省中曰及第時有秀才未願起者州縣必根刷遣之程文分兩科曰詩賦曰經義魁各分焉三歲一試進士貢院以二寸紙書及第者姓名給之號喜帖明日舉按而出樂作及門擊鼓十二面以法雷震殿試臨期取旨又將一人特贈一官授奉直大夫翰林應奉文字第一人第二人止授從事郎餘並授從事郎聖宗時止以詞賦法律取士詞賦為正科法律為雜科若夫任子之令不論文武並奏蔭亦有負數



契丹國志卷之二十四

王沂公行程錄

初奉使者止達幽州後至中京又至上京或西涼淀北安州炭山長泊自雄州白溝驛度河四十里至新城縣古督亢亭之地又十里至涿州北渡涿水范水劉李河六十里至良鄉縣度盧溝河六十里至幽州號燕京子城就羅郭西南爲之正南曰啓夏門內有元和殿洪政殿東門曰宣和城中坊門皆有樓有閔忠寺本唐太宗爲征遼陣亡將士所造又有開泰寺魏王耶律漢寧造皆邀朝士遊觀城南門外有于越王解爲宴集之所門外永平館舊名碣石館請和後易之南即桑乾河出北門過長城延芳淀四十里孫侯館改爲望京館稍移故

處望楮谷山五龍池過温餘河大夏城坡坡西北即涼淀避暑之地五十里至順州東北過曰嶼河北望銀冶山又有黃羅螺盤牛闌山七十里至檀州自北漸入山五十里至金溝館將至館川原平曠謂之金溝淀國主嘗於此過冬自此入山詰曲登涉無復里堠但以馬行記日景而約其里數過朝鯉河亦名七度河九十里至古北口兩旁峻崖中有路僅容車軌口北有鋪穀弓連繩本范陽防扼奚契丹之所最爲隘東然幽州東趨營平州甚平坦自頃犯邊多由斯出又度德勝嶺盤道數層俗名思鄉嶺八十里至新館過雕窠嶺偏槍嶺四十里至卧如來館蓋山中有卧佛像故也過烏灤河東有灤州因河爲名又過墨斗嶺亦名渡雲嶺長二十里許又



過芹菜嶺七十里至柳河館河在館傍西北有鉄治多  
渤海人所居就河漉沙石鍊得成鉄渤海俗每歲時聚  
會作樂先命善歌舞者數輩前行士女相隨更相唱和  
回旋宛轉號曰踏鋤所居室皆就山墻開門過松亭嶺  
甚險峻七十里至打造部落館雖有番戶百餘編荆爲  
離鍛鐵爲軍器東南行五十里至牛山館八十里至鹿  
兒峽館過蝦蟆嶺九十里至鐵漿館過石子嶺自北漸  
入山七十里至當谷館居民多造車者云渤海人正東  
望馬山山多禽獸林木國主多於此打圍八十里至通  
天館二十里至中京大定府城垣大小方圓繞四里許  
門但重屋無築閣之制南門曰朱夏門內夾道步廊多  
坊門又曰陽德閭闔城內西南隅岡上有寺城南有園  
圃宴射之所自過古北口即蕃境居人草庵板屋亦務  
耕種但無桑柘所種皆從隴上蓋虞吹沙所壅山中長  
松鬱然深谷中多燒炭爲業時見畜牧牛馬橐駝尤多  
青羊黃豕亦有挈車帳逐水草射獵食止糜粥炒糲

富鄭公行程錄

富鄭公之使北朝也自中京正北八十里至臨都館又  
四十里至官窰館又七十里至松山館又七十里至崇信  
館又九十里至廣寧館又五十里至姚家寨館又五十  
里至咸寧館又三十里度潢水石橋旁有饒州蓋唐朝  
嘗於契丹置饒樂州也今渤海人居之又五十里至保  
和館度黑河七十里至宣化館又五十里至長泰館西  
二十里許有佛寺民社云即祖州亦有祖山山中有阿



保機廟四十里至上京臨潢府自過崇信館即契丹舊境蓋其南皆奚地也又西門門曰金德內有臨潢館子城東門曰順陽入門北行至景福門又至承天門內有昭德宣政二殿皆東向其禮廬亦皆東向臨潢西北二百餘里號涼淀在漫頭山南避暑之處多豐草掘丈餘即堅冰云

余尚書北語詩

余靖尚書使契丹為北語詩契丹愛之再往益親余詩云夜筵設罷侈盛也臣拜洗受賜也兩朝厥荷通好也情幹勒厚重也微臣稚魯拜舞也祝若統福佑也聖壽鐵擺嵩高也俱可忒無極也國主舉大杯謂余曰能道此余為鄉飲復舉之國主大笑遂為醕觴

刁奉使北語詩

刁約使契丹為北語詩云押燕移离畢接离畢官名看房賀跋支賀跋支如餞行三匹裂匹裂以小木製以木色綾木為之如黃漆密賜十貔狸形如鼠而大尤香食之如豚肉而脆北朝為珍膳味如豚肉而脆



契丹國志卷之二十五

胡嶠陷北記

同州郃陽縣令胡嶠居契丹七年周廣順二年亡歸中國略能道其所見云自幽州西北入居庸關明日又西北入石門關關路崖狹一夫可以當百此中國控扼契丹之險也又三日至可汗州南望五臺山其一峯最高者東臺也又三日至新武州西北行五十里有鷄鳴山云唐太宗北伐聞雞鳴于此因以名山明日入永定關北此唐故關也又四日至歸化州又三日登天嶺嶺東西連亘有路北下四顧真然黃雲白草不可窮極契丹謂嶠曰此碎鄉嶺也可一南望而爲永訣同行者皆慟哭往往絕而復蘇又行三四日至黑榆林時七月寒如深冬又明日入斜谷谷長五十里高崖峻谷仰不見日而寒尤甚已出谷得平地氣稍溫又行二日渡湟水又明日渡黑水又二日至湯城淀地氣最溫契丹苦大寒則就溫于此其水泉清冷草軟如茸可藉以寢而多異花記其二種一曰旱金大如掌金色燦人一曰青囊如中國金燈而色類藍可愛又二日至儀坤州渡麝香河自幽州至此無里候其所向不知爲南北又二日至赤崖蕭翰與世宗兀欲相及遂及述律后太祖戰于沙河述律兵敗而北兀欲追至獨樹渡遂因述律于撲馬山又行三日遂至上京所謂西樓也西樓有邑屋市四交場無錢而用布有綾錦諸工作官者翰林伎術教坊角觝秀才僧尼道士等皆中國人而并汾幽薊之人尤多自上



京東去四十里至真珠寨始食菜明日東行地勢漸高  
西望平地松林鬱然數十里遂入平川多草木始食西  
瓜云契丹破回紇得此種以牛糞覆棚而種大如中國  
冬瓜而味甘又行東至裏潭始有柳而水草豐美有息  
雞草尤美而本大馬食不過十本而飽自裏潭入大山  
行十餘日而出過一大林長二三里皆蕪美枝葉有芒  
刺如箭羽其地皆無草兀欲時卓帳于此會諸部人葬  
太宗自此西南行日六十里行七日至大山門兩高山  
相去一里而長松豐草珍禽異獸野卉有室室碑石曰陵  
所也兀欲入祭諸部大人惟執祭器者得入入而門闔  
明日開門曰拋盃禮畢問其禮皆秘不肯言嶠所目見  
囚述律葬太宗等事與中國所記差異已而翰得罪被  
鑕嶠與部曲東之福州福州翰所治也嶠等東行過一  
山名十三山云此西南去幽州二千里又東行數日過  
衛州有居人三十餘家蓋契丹所虜中國衛州人築城  
而居之嶠至福州而契丹多憐嶠教其逃歸嶠因得其  
諸國種類遠近云距契丹國東至于海有鐵甸其族野  
居皮帳而人剛勇其地少草木水鹹濁色如血澄之久  
而後可飲又東女真善射多牛鹿野狗其人無定居行  
以牛負物遇雨則張革為屋常作鹿鳴呼鹿而射之食  
其生肉能釀糜為酒醉則縛之而睡醒而後解不然則  
殺人又東南渤海又東遼國皆與契丹畧同其南海曲  
有魚鹽之利又南奚與契丹畧同而人好殺戮又南至  
于榆關矣西南至儒州皆故漢地西則突厥回紇西北



至媼歛律其人長大髦頭酋長全其髮盛以紫囊池苦  
寒水出大魚契丹仰食又多黑白黃貂鼠皮北方諸國  
皆仰足其人最勇隣國不敢侵又其西轄戛又其北單  
于突厥皆與媼歛律畧同又北黑車子善作車帳其人  
知孝義地貧無所產云契丹之先常役回紇後背之走  
黑車子始學作車帳又北牛蹄突厥人身牛足其地尤  
寒水曰瓠瓢河夏秋水厚二尺春冬冰徹底常燒罌銷  
冰乃得飲東北至鞞劫子其人髦首披布為衣不鞍而  
騎大弓長箭尤善射遇人輒殺而生食其肉契丹等國  
皆畏之契丹五騎遇一鞞劫子則皆散走其國三面皆  
室韋一曰室韋二曰黃頭室韋三曰獸室韋其地多銅  
鐵金銀其人工巧銅鐵諸器皆精好善織毛錦地尤寒

丹志十五

馬溺至地成冰堆又北狗國人身狗首長毛不衣手搏  
猛獸語為犬嗥其妻昔人能漢語生男為狗女為人自  
相婚嫁穴居食生而妻女人食云嘗有中國人至其國  
其妻憐之使逃歸與其筋十餘隻教其每走十餘里遺  
一筋狗夫追之見其家物必嚙而歸則不能追矣其說  
如此又曰契丹嘗選百里馬二十匹遣十人齎乾餼北  
行窮其所見其人自黑車子歷牛蹄國以北行一年經  
四十三城居人多以木皮為屋其語言無譯者不知其  
國地山川部族名號其地氣遇平地則溫和山林則寒  
冽至三十三城得一人能鐵甸語其言頗可解云地名  
頡利烏于邪堰云自此以北龍蛇猛獸魑魅群行不可  
往矣其人乃還此北荒之極也契丹謂嶠曰夷狄之人



豈能勝中國然晉所以敗者主暗而臣不忠因具道諸國事曰子歸悉以語漢人使漢人努力事其主無為夷狄所虜吾國非人境也嶠歸錄以為記云

張舜民使北記

殺狐林

契丹主太宗怒晉出帝不稟北命擅登大寶自將兵南下執出帝并母后大臣北歸於鄴西愁死崗得疾至鑿城殺狐林而崩崗者本陳思王不為文帝所容於此悲吟號愁思崗託為愁死殺狐林者村民林中射殺一狐因以名之

兜玄國

契丹上京曾有人忽見一青衣駕赤犢出耳中別有天地花木繁茂云此兜玄國也

割馬肝

張舜民使契丹是時耶律永興姚跋洄二人接伴舜民因問北馬有割去肝者遂無病能行果否答云有之其法飲以醇酒於腋間破之取去少肉然亦十喪八九

鵬巢生獵犬

舜民又問北地鵬巢中生獵犬果不若答云亦有之然極難得今駕前有二隻其性頗異每獵而獲十倍於常犬

吹葉成曲

胡人吹葉成曲以番歌相和音韻甚和

銀牌

銀牌形如方響刻蕃書置速一字使者執牌馳馬日行



數百里牌所至如國主親到需索更易無敢違者

佛粧

北婦以黃物塗面如金謂之佛粧

以車渡河

過盧溝河伴使云恐乘橋危莫若車渡極安且可速濟  
南人不曉其法

契丹國志卷之二十五



契丹國志卷之二十六

奚國

奚國

太祖初興擊奚滅之復立奚王而使契丹監其兵後為中京詳見前志

古肅慎國

古肅慎城方五里在渤海國二十里遺堞尚在

室韋國

字或為失蓋契丹之類其南者為契丹在北者號為室韋路出和龍北千餘里入契丹國與奚契丹同夏則城居冬逐水草有南室韋北室韋其俗丈夫皆披髮婦人皆盤髮衣服與契丹同乘牛車以蘆蔭為屋如輶車狀度水則束薪為棹或有以皮為舟者馬則織草為韉結繩為轡氣候多寒田收其薄惟鷹鹿射獵為務食肉衣皮鑿冰沒水中而網取魚鱉地多積雪懼陷阮穿騎木而行太祖併諸蕃二十六國室韋在其中

新羅國

新羅在高麗東國本漢時樂浪地其言語名物有似中國人名國為邦宮為孤賊為寇行酒為行觴相呼皆為徒文字甲兵同於中國選人壯健者悉入軍每月旦相賀王設宴會班賚群官有大事則聚官詳議定之田甚良沃水陸兼種服色尚素婦人辮髮統頭以雜綵及珠為飾婚嫁唯酒食而已輕重隨貧富新羅國王誦自契丹承天皇后初臨朝入貢其後王誦為部下所殺立其弟詢契丹以王誦進貢兵北討十年方罷兵新羅依舊朝貢



高昌國

高昌都交河城漢車師前王庭也四面多大山晉以其地爲高昌郡地名石績氣候溫暖礮土良沃麥一歲再熟宜蚕有草名羊刺其上生蜜而味甚佳引水溉田出赤鹽其味甚美俗事天神兼信佛法其官有八長史有五將軍又有侍郎校郎主簿從事階位相次契丹時三年一次朝貢進獻玉珠乳香斜合里皮褐里絛等亦有互市其國主親與地主評價

女真國

女真世居混同江之東山乃鴨綠水之源東瀕海南鄰高麗西接渤海北近室韋其地乃肅慎故區也地方數千里戶口十餘萬無大君長立首領分主部落地饒山林田宜麻穀土產人參蜜蠟北珠生金細布松實白附子禽有鷹鸞海東青之類獸多牛馬麋鹿野狗白羆青鼠貂鼠後爲契丹所制擇其酋長出襲又於長春路置東北統軍司黃龍府置兵馬都部署司咸州置詳穩司分隸之役屬於契丹其後常遣銀牌天使至女真每夕必欲薦枕者其國舊輸中下戶作止宿麪以未出適女待之後求海東青使者絡繹恃大國使命惟擇美好婦人不問其有夫及閹閹高者女真浸忿遂叛

黃頭女真

黃頭女真皆山居號合蘇館女真合蘇館河西亦有之有八館在黃河東與金粟城五花城隔河相近其人鬪朴勇驚不能別死生契丹每出戰皆被以重札令前驅



於此於彼皆黃目情多綠亦黃而白多

### 嗚熱者國

嗚熱者國最小不知其始所居後爲大祖徙置黃龍府南百餘里曰賓州州近混同江即古之粟末河黑水也部落雜處以其族類之長爲十戶統之契丹貴游子第及富家兒月夕被酒則相率携樽馳馬戲飲其地婦女聞其至多聚觀之間令侍坐與之酒則飲亦有起舞歌謳以侑觴者邂逅相契調謔往反即載以歸婦之父母知亦不爲之顧留數歲有子始具茶食酒數車歸寧謂之拜門因執子婿之禮其俗謂男女自媒勝於納幣而婚者飲食皆以木器好宜盪他人欲其不驗者云二彈指於器上則其毒自解亦間有遇毒而斃者族多姓李

### 渤海國

渤海國去燕京東北千五百里以石累城脚東並海其王舊曰大爲姓右姓曰高張楊寶烏李不過數種部曲奴婢無姓者皆從其主婦人皆悍妬大氏與他姓相結十姊妹迭幾察其夫不容側室及他游聞則必謀置其毒死其所愛一夫有所犯而妻不之覺者衆人則群聚而詬之爭以忌嫉相夸男子多智謀驍勇出他國右至有三人渤海當一虎之語自天祚之亂金人陷城憲其難制轉徙他所其人大怨富室安居踰二百年往往爲園地植菘多至三二百本有數十榦叢生者皆燕地所無統以十數千或五千賤質而去其居故地者仍契丹舊爲東京置留守有蘇扶復等州蘇與宋登州青州相直每大風順隱隱聞雞犬聲





正旦

正月一日國主以糯米飯白羊髓相和為團如拳大於  
逐帳內各散四十九箇候五更三點國主等各於本帳  
內牕中擲米團在帳外如得雙數當夜動蕃樂飲宴如  
得隻數更不作樂便令師巫十二人外邊遶帳撼鈴執  
箭唱叫於帳內諸人爐內爆鹽并燒地拍鼠謂之驚鬼  
本帳人第七日方出乃禳度之法北呼此謂之妳捏離  
漢人譯云妳是丁担離是日

立春

立春日婦人進春書以青緞為幟刻龍像啣之或為蝦蟆

人日

人日京都人食煎餅於庭中俗云熏天未知所從出也

中和

二月一日大族姓蕭蕭者亦請耶律姓者於本家筵席此  
節為轄里尉漢人譯云轄里是請尉是時

上巳

三月三日國人以木雕為兔分兩朋走馬射之先中者  
勝其負朋下馬跪奉勝朋人酒勝朋於馬上接盃飲之  
北呼此節為淘裏化漢人譯云淘裏是兔化是射

佛誕日

二月八日京府及諸州各用木雕悉達太子一尊城上  
舉行放僧尼道士庶民行城一日為樂



端五

五月五日午時採艾葉與綿相和絮衣七事國主着之  
番漢臣僚各賜艾衣三事國主及臣僚飲宴渤海厨子進  
艾糕各點大黃湯下北呼此節為討賽離又以雜絲結  
合歡索纏於臂膊婦人進長命縷宛轉比日為人象帶之

朝節

夏至日婦人進扇及粉脂囊

三伏

六月十八日大族耶律姓並請蕭姓者亦名瞎里厨

中元

七月十三日夜國主離行宮向西三十里卓帳宿先於  
彼處造酒食至十四日應隨從諸軍並隨部落動番樂

設宴至暮國主却歸行宮謂之迎節十五日動漢樂大  
宴十六日早却往西方令隨行軍兵大噉三聲謂之送  
節此節為賽離捨漢人譯云賽離是月捨是好謂月好也

中秋

八月八日國主殺白犬於寢帳前七步埋其頭露其鬣  
後七日移寢帳於埋狗頭上北呼此節為担褐妳漢人  
譯云担褐是狗妳是頭

重九

九月九日國主打團斗射虎少者輸重九一筵席射罷  
於地高處卓帳與番漢臣登高飲菊花酒出兔肝切生  
以鹿舌醬拌食之北呼此節為必里達離漢人譯云九  
月九日也又以采葉研酒西門戶間辟惡亦有入塩少許而



飲之者又云男摘二九粒女一九粒以酒咽者大能辟惡

小春

十月內五京進紙造小衣甲并鎗刀器械各一萬副十  
五日一時堆塚國主與押番臣寮望木葉山嶺奠酒  
拜用番字書狀一紙同文燒奏木葉山神云寄庫北呼  
此時為戴鞞漢人譯云戴是燒鞞是甲

冬至

冬至日國人殺白羊白馬白鴈各取其生血和酒國主  
北望拜黑山奠祭山神言契丹死魂為黑山神所管又  
彼人傳云凡死人悉屬此山神所管富民亦然契丹黑  
止如中國之代宗云北人死魂皆歸此山每歲五京進  
人馬紙各萬餘裏祭山而焚之其禮甚嚴非祭不敢近山

臘月

臘月國主帶甲戎裝應番漢臣諸司使已上並戎裝五  
更三點坐朝動樂飲酒罷各等奉賜御甲羊馬北呼此  
節為抄離時漢人譯云抄離是戰時是時是戰時也

治盜

正月十三日放國人做賊三日如盜及十貫以上依法  
行遣北呼為鶻里時漢人譯云鶻里是偷時是時

行軍

契丹行軍不擇日用艾和馬糞於白羊琵琶骨正灸灸  
破便出行不破即不出

午日

契丹出軍每遇午日起程如不用兵亦須排辦望西天



噉七聲音午是北朝大王之日

旋風

契丹人見旋風合眼用鞭望空打四十九口道坤不刻七聲

舍利

契丹富豪民要裹頭巾者納牛駝十頭馬百匹并給契丹名目謂之舍利

跪拜

男女拜皆同其一足跪一足着地以手動為節數止於三彼言捏骨地者即跪也

長白山

長白山在冷山東南千餘里蓋白衣觀音所居其山禽獸皆白人不敢入恐穢其間以致蛇虺之害黑水發源

於此舊云粟末河太宗破晉改為混同江其俗剝木為舟長可八尺形如梭曰梭船上施一槩止以捕魚至渡車則方舟或三舟

澤蒲

西樓有蒲瀕水叢生一榦葉如柳長不盈尋丈用以作箭不矯揉而堅左氏所謂董澤之蒲是也

回鶻豆

回鶻豆高二尺許直榦有葉無旁枝角長二寸每角止兩豆一根才六七角色黃味如粟

螳螂

渤海螳螂紅色大如椀螯巨而厚其脆如中國螳螂石舉鮫魚之屬皆有之（契丹國志卷之二十七）









契丹國志余向藏鈔本其上方有小字標明書中  
眼目衆皆以為此必有所據及觀書華陽顧氏  
見元刻本方信鈔本所自出果元本也昨歲春  
間鮑渌飲以元刻見歸末尾卷多缺急向顧  
氏借錄孰知顧本自十五卷已下皆缺乎遂  
就其見存之卷校補缺字而還之至于鈔本  
与元刻又多不同未必影寫擬補缺字未敢  
深信也 丁卯正月十有九日復翁



歲在辛未仲夏書友有以契丹國  
志鈔本求售者余見其裝潢識  
是述古堂物且与元刻款式同  
因留閱其所携本適為下冊  
遂請西賓陸東蘿鈔補余  
書之缺亦一快事也小日者浚一  
日雨牕復翁識





圖書在版編目(CIP)數據

契丹國志/[宋]葉隆禮撰. —北京:北京圖書館出版社, 2005.1

(中華再造善本)

ISBN 7-5013-2667-3

I. 契… II. 葉… III. 中國—古代史—遼代—紀傳體  
IV. K246.104.2

中國版本圖書館CIP數據核字(2005)第002430號

ISBN 7-5013-2667-3



9 787501 326679 >

書名 契丹國志(全六冊)  
著者 [宋]葉隆禮撰

出版

北京圖書館出版社(100034北京市西城區文津街七號)

Tel:(010)66151313 Fax:(010)66174391

E-mail:Btsfxb@nlc.gov.cn

Website:www.nlcpress.com

造紙

華寶齋

杭州富陽古籍印刷廠

開本

八

印張

四七·二五

版次

二〇〇五年一月第一版第一次印刷

印數

一·一〇〇〇

書號 ISBN 7-5013-2667-3/K·1001

定價 一五二〇圓



